

BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
VLADA KANTONA SARAJEVO

**ZAKON  
O REGISTRU FINANSIJSKIH OBAVEZA  
U KANTONU SARAJEVO  
(NACRT)**

Predlagač:  
Ministarstvo finansija Kantona Sarajevo

Sarajevo, oktobar 2019. godine

Na osnovu člana 12. tačka m) i člana 18. tačka b) Ustava Kantona Sarajevo („Službene novine Kantona Sarajevo“, br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj 19.11.2019. godine, donijela je

**NACRT**

**ZAKON  
O REGISTRU FINANSIJSKIH OBAVEZA  
U KANTONU SARAJEVO**

**POGLAVLJE I - UVODNE ODREDBE**

**Član 1.  
(Predmet)**

(1) Ovim zakonom utvrđuje se način uspostave, sadržaj i vođenje jedinstvenog registra finansijskih obaveza u Kantonu Sarajevo (u daljem tekstu: Registar).

(2) Registar je objedinjena evidencija podataka o finansijskim obavezama obveznika unosa podataka.

(3) Pod obveznicima unosa podataka iz stava (2) ovog člana podrazumijevaju se: kantonalna ministarstva, kantonalne uprave i kantonalne upravne organizacije, stručne i druge službe organa zakonodavne i izvršne vlasti, sudovi, Kantonalno tužilaštvo Kantona Sarajevo, Pravobranilaštvo Kantona Sarajevo, Univerzitet u Sarajevu, drugi budžetski korisnici Kantona Sarajevo, vanbudžetski fondovi, jedinice lokalne samouprave, pravobranilaštva jedinica lokalne samouprave, javne ustanove i javna preduzeća čiji je osnivač Kanton Sarajevo, javna preduzeća i javne ustanove čiji je osnivač jedinica lokalne samouprave u Kantonu Sarajevo, te pravna lica u kojim Kanton Sarajevo i/ili jedinica lokalne samouprave u Kantonu Sarajevo učestvuje sa više od 50% ukupnog kapitala.

(4) Obveznici unosa podataka iz stava (3) ovog člana u Registar unose podatke o vlastitim finansijskim obavezama.

(5) Registar se uspostavlja i vodi u elektronskom obliku pod nazivom Registar finansijskih obaveza u Kantonu Sarajevo.

**Član 2.  
(Definicija finansijskih obaveza)**

Pod finansijskim obavezama u smislu ovog zakona podrazumijevaju se: obaveze po primljenim kreditima, obaveze po izdatim garancijama, obaveze po osnovu poreza i doprinosa koje nisu plaćene u periodu dužem od 180 dana od dana dospijeaća, potencijalne obaveze po osnovu tužbi i nepravosnažnih sudskih odluka, obaveze po osnovu pravosnažnih sudskih odluka, sudskih ili vansudskih nagodbi, obaveze po osnovu izvršnih sudskih rješenja i obaveze prema dobavljačima roba i usluga koje nisu plaćene u periodu dužem od 180 dana od dana dospijeaća.

**Član 3.  
(Svrha Registra)**

Registar iz člana 1. ovog zakona predstavlja jedinstvenu evidenciju podataka o finansijskim obavezama obveznika unosa podataka u svrhu centralizovanog, kvalitetnog i efikasnog upravljanja novčanim sredstvima u Kantonu Sarajevo (u daljem tekstu: Kanton).

**Član 4.  
(Rodna neutralnost izraza)**

Izrazi koji su radi preglednosti dati u jednom gramatičkom rodu u ovom zakonu, bez diskriminacije se odnose i na muški i na ženski rod.

## **POGLAVLJE II - USPOSTAVA, SADRŽAJ I VOĐENJE REGISTRA**

### **Član 5. (Uspostava Registra)**

- (1) Registar uspostavlja i vodi Ministarstvo finansija Kantona Sarajevo (u daljem tekstu: Ministarstvo).
- (2) Nakon uspostave Registra, njegovim daljim razvojem, unapređenjem i korištenjem podataka upravlja Ministarstvo.
- (3) Ministarstvo je ovlašteno da prikuplja, evidentira, obrađuje, koristi i arhivira podatke sadržane u Registru.
- (4) Na osnovu podataka sadržanih u Registru, Ministarstvo, u cilju efikasnijeg upravljanja finansijskim obavezama i saniranja ukupnog duga u Kantonu, kreira i predlaže politike, strategije i mjere koje razmatra i usvaja Vlada Kantona Sarajevo, a za jedinice lokalne samouprave, pravobranilaštva jedinica lokalne samouprave, javna preduzeća i javne ustanove čiji je osnivač jedinica lokalne samouprave te pravna lica u kojim jedinica lokalne samouprave u Kantonu Sarajevo učestvuje sa više od 50% ukupnog kapitala, gradsko odnosno općinsko vijeće.
- (5) U obavljanju poslova u vezi sa Registrom, stručno-operativnu i tehničku pomoć Ministarstvu pružaju Zavod za informatiku i statistiku Kantona Sarajevo (u daljem tekstu: Zavod) i obveznici unosa podataka u smislu ovog zakona.

### **Član 6. (Sadržaj Registra)**

- (1) Registar čini sedam podregistara finansijskih obaveza, i to: podregistar primljenih kredita, podregistar izdatih garancija, podregistar poreza i doprinosa, podregistar tužbi i nepravosnažnih sudskih odluka, podregistar pravosnažnih sudskih odluka/sudskih ili vansudskih nagodbi, podregistar izvršnih sudskih rješenja i podregistar dobavljača i drugih povjerilaca.
- (2) Podaci o konkretnoj finansijskoj obavezi unose se u odgovarajući podregistar iz stava (1) ovog člana, popunom predviđenih rubrika u aplikaciji informatičkog sistema.
- (3) Unos podataka o finansijskim obavezama obveznika unosa podataka vrši se na osnovu relevantne dokumentacije.
- (4) Ministar finansija Kantona Sarajevo (u daljem tekstu: ministar) može dopunjavati uspostavljeni Registar, odnosno utvrđivati nove podregistre pored podregistara iz stava (1) ovog člana.

### **Član 7. (Obaveza unosa podataka)**

- (1) Ministar donosi uputstvo kojim se bliže uređuje postupak unosa i verifikacije podataka unesenih u Registar.
- (2) Obveznici unosa podataka dužni su imenovati odgovorna i ovlaštena lica za unos podataka u Registar u roku od 30 dana od dana stupanja na snagu ovog zakona i o imenovanim licima pisanim putem dostaviti podatke Ministarstvu.
- (3) Upute za registraciju i dobijanje korisničke šifre sa odgovarajućom privilegijom sastavni su dio uputstva iz stava (1) ovog člana.
- (4) Obveznici unosa podataka dužni su o svakoj promjeni odgovornih i ovlaštenih lica za unos podataka pisanim putem obavijestiti Ministarstvo u roku od sedam dana od dana promjene.

**Član 8.**  
**(Osiguranje uslova za vođenje Registra i edukacija)**

- (1) Rukovodilac obveznika unosa podataka odgovoran je za osiguranje potrebnih kadrovskih i tehničkih kapaciteta za unos podataka u Registar.
- (2) Za provedbu obavezne edukacije odgovornih i ovlaštenih lica iz člana 7. stav (2) ovog zakona, odgovorno je Ministarstvo.
- (3) Edukacija iz stava (2) ovog člana će se realizovati u roku od 60 dana od dana stupanja na snagu ovog zakona.

**Član 9.**  
**(Rokovi za unos i verifikaciju podataka)**

- (1) Obveznici unosa podataka su dužni u roku od 90 dana od dana stupanja na snagu ovog zakona izvršiti unos podataka o svim finansijskim obavezama, u skladu sa njegovim odredbama.
- (2) Nakon inicijalnog unosa podataka iz stava (1) ovog člana, obveznici unosa podataka su dužni sve naknadne promjene podataka uredno evidentirati u Registru najmanje jednom kvartalno, do posljednjeg dana tekućeg mjeseca za prethodni kvartal.
- (3) Rukovodioci obveznika unosa podataka dužni su u rokovima iz st. (1) i (2) ovog člana elektronski verifikovati izvršeni unos potvrdom u odgovarajućem polju aplikacije.

**Član 10.**  
**(Odgovornost za tačnost podataka)**

- (1) Obveznici unosa podataka su odgovorni za tačnost podataka unesenih u Registar.
- (2) Odgovorna i ovlaštena lica obveznika unosa podataka iz člana 7. stav (2) ovog zakona dužna su naknadno uočene pogrešne podatke korigovati odmah po saznanju.

**Član 11.**  
**(Vođenje Registra)**

- (1) Ministarstvo primjenom odgovarajućih rješenja podatke pripremljene od obveznika unosa podataka objedinjuje u jedinstvenu bazu automatskim preuzimanjem podataka.
- (2) Ministarstvo je dužno da reaguje prema obveznicima unosa podataka i/ili preduzme zakonom propisane mjere ukoliko uoči nepoštivanje odredaba ovog zakona.

**POGLAVLJE III - KORIŠTENJE PODATAKA**

**Član 12.**  
**(Ovlaštenja za pristup podacima iz Registra)**

- (1) Odgovorna i ovlaštena lica za unos podataka iz člana 7. stav (2) ovog zakona isključivo mogu pristupati podacima o finansijskim obavezama obveznika unosa podataka koji ih je imenovao.
- (2) Podaci uneseni pod jednom korisničkom šifrom mogu biti izmijenjeni pod drugom korisničkom šifrom dodijeljenom istom obvezniku unosa podataka.
- (3) Pored lica iz stava (1) ovog člana, pristup podacima u Registru imaju rukovodioci obveznika unosa podataka za podatke koji se odnose na finansijske obaveze obveznika unosa podataka.
- (4) Ministar je ovlašten da pristupa svim podacima u Registru.
- (5) Pravo pristupa i upravljanja podacima ima i lice ovlašteno za administriranje Registra u Ministarstvu.
- (6) Izuzetno od stava (4) ovog člana, ministar može donijeti odluku kojom ovlaštenje za pristup svim podacima u Registru odobrava i drugom licu.

(7) Lica iz st. (3), (4), (5) i (6) ovog člana nemaju ovlaštenje za unos podataka u Registar, izuzev ako su u skladu sa članom 7. stav (2) ovog zakona imenovani za odgovorna i ovlaštena lica.

### **Član 13. (Ustupanje podataka)**

(1) Registar finansijskih obaveza nije javan.

(2) Ministarstvo nije ovlašteno distribuirati ili objavljivati podatke u njihovom izvornom obliku, niti ustupati bazu podataka bilo kojem fizičkom ili pravnom licu.

(3) Ministar može sintetičke izvještaje, analize i informacije sačinjene na osnovu podataka iz Registra učiniti dostupnim u svrhu statističke ili naučno-istraživačke obrade, preduzimanja mjera na provedbi ovog zakona, te izvršavanja nadležnosti zakonodavne, izvršne ili sudske vlasti.

### **Član 14. (Održavanje softverske aplikacije i zaštita podataka u Registru)**

(1) Za održavanje softverske aplikacije i očuvanje povjerljivosti, integriteta i osiguranje dostupnosti podataka u Registru odgovoran je Zavod.

(2) Za povjerljivost korisničke šifre odgovoran je korisnik.

### **Član 15. (Pohrana izmjena i ispravki podataka u Registru)**

Zavod je dužan da osigura pohranu i čuvanje informacija o svim podacima prvobitno unesenim u Registar, bez obzira na njihove naknadne izmjene ili ispravke, te licima i korisničkim šiframa pod kojim su podaci prvobitno uneseni, odnosno naknadno izmijenjeni ili ispravljeni.

## **POGLAVLJE IV - KAZNENE ODREDBE**

### **Član 16. (Kršenje odredaba)**

(1) Odgovorno i ovlašteno lice iz člana 7. stav (2) ovog zakona, koje namjerno ili iz nepažnje propusti da unese podatke ili izvrši unos netačnih podataka o finansijskim obavezama obveznika unosa podataka, ukoliko radnja ne sadrži obilježja krivičnog djela, kazniće se novčanom kaznom od 500 do 1.000 KM.

(2) Za ponovljeni prekršaj iz stava (1) ovog člana odgovorno i ovlašteno lice kazniće se novčanom kaznom od 2.000 do 3.000 KM.

(3) Za nepotpun ili netačan unos podataka iz stava (1) ovog člana i nepostupanje u skladu sa članom 7. st. (2) i (4) ovog zakona, kazniće se rukovodilac obveznika unosa podataka novčanom kaznom od 1.000 do 2.000 KM.

(4) Za ponovljeni prekršaj iz stava (3) ovog člana, rukovodilac obveznika unosa podataka kazniće se novčanom kaznom od 3.000 do 5.000 KM.

(5) Ministarstvo pokreće prekršajni postupak za prekršaje iz ovog člana, u skladu sa Zakonom o prekršajima („Službene novine Federacije BiH“, broj 63/14).

### **Član 17. (Disciplinska odgovornost)**

Rukovodilac obveznika unosa podataka, odgovorna i ovlaštena lica iz člana 7. stav (2) ovog zakona i zaposlenici Ministarstva i Zavoda, u svom djelokrugu rada i u skladu sa odredbama ovog zakona, podliježu disciplinskoj odgovornosti shodno posebnim propisima.

## **POGLAVLJE V – PRELAZNE I ZAVRŠNE ODREDBE**

### **Član 18.**

#### **(Donošenje podzakonskih propisa)**

- (1) Ministar će u roku od 30 dana od dana stupanja na snagu ovog zakona donijeti uputstvo iz člana 7. stav (1) ovog zakona.
- (2) Zavod će u roku od 30 dana od dana stupanja na snagu ovog zakona donijeti akt kojim će propisati mjere, sredstva i uslove zaštite i pohrane podataka.

### **Član 19.**

#### **(Nadzor)**

Nadzor nad provođenjem ovog zakona vrši Ministarstvo.

### **Član 20.**

#### **(Stupanje na snagu)**

Ovaj zakon stupa na snagu osmog dana od dana objavljivanja u „Službenim novinama Kantona Sarajevo“.

Predsjedavajući  
Skupštine Kantona Sarajevo  
**Elmedin Konaković**

Broj: 01-02-41216  
Sarajevo, 19.11.2019. godine

## **O B R A Z L O Ž E N J E**

### **PRAVNI OSNOV**

Pravni osnov za donošenje Zakona o Registru finansijskih obaveza u Kantonu Sarajevo sadržan je u odredbama člana 12. tačka m) Ustava Kantona Sarajevo („Službene novine Kantona Sarajevo“, br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17), kojim je utvrđeno da Kanton Sarajevo ima sve nadležnosti koje nisu izričito povjerene federalnoj vlasti ili koje ne spadaju u vlastite nadležnosti jedinica lokalne samouprave, a posebno je nadležan za finansiranje djelatnosti kantonalnih vlasti ili kantonalnih agencija oporezivanjem, zaduživanjem ili drugim sredstvima, i člana 18. tačka b) kojim je utvrđeno da je u nadležnosti Skupštine Kantona Sarajevo, između ostalog, i donošenje zakona i drugih propisa u okviru izvršavanja nadležnosti Kantona.

### **RAZLOZI ZA DONOŠENJE**

Na nivou Kantona Sarajevo nije uspostavljena jedinstvena baza podataka o svim obavezama kantonalnih ministarstava, kantonalnih uprava i kantonalnih upravnih organizacija, stručnih i drugih službi organa zakonodavne i izvršne vlasti, i drugih budžetskih korisnika Kantona Sarajevo, vanbudžetskih fondova, jedinica lokalne samouprave, javnih ustanova i javnih preduzeća čiji je osnivač Kanton Sarajevo, javnih preduzeća i javnih ustanova čiji je osnivač jedinica lokalne samouprave u Kantonu Sarajevo, te pravnih lica u kojim Kanton Sarajevo i/ili jedinica lokalne samouprave u Kantonu Sarajevo učestvuje sa više od 50% ukupnog kapitala (npr. obaveze po sudskim odlukama, obaveze prema vanbudžetskim fondovima, dobavljačima, i sl.).

Jedinstvena evidencija takvih podataka je podloga temeljem koje bi bilo moguće vršiti potrebne analize, predlagati i donositi odgovarajuće politike, strategije i mjere, sa ciljem da se u konačnici efikasnije upravlja obavezama i utiče na smanjenje duga u Kantonu Sarajevo. Objedinjenost podataka je od posebne koristi za praćenje i dijagnostiku problematike kašnjenja u ispunjavanju obaveza po različitim osnovama, te služi kao okidač za blagovremeno djelovanje i minimiziranje štetnih posljedica po budžet Kantona Sarajevo.

Na osnovu svega naprijed obrazloženog, Ministarstvo finansija Kantona Sarajevo procjenjuje da je uspostavljanje jedinstvenog registra finansijskih obaveza u Kantonu Sarajevo od izuzetnog značaja, te predlaže Vladi Kantona Sarajevo da utvrdi Nacrt zakona o Registru finansijskih obaveza u Kantonu Sarajevo.

### **USKLAĐENOST SA LEGISLATIVOM EVROPSKE UNIJE**

Oblast koju obrađuje ovaj zakon nije posebno regulisana u zakonodavstvu odnosno uredbama, direktivama i odlukama Evropske unije.

### **PRAVNA RJEŠENJA**

**U članu 1.** utvrđuje se predmet, definišu obveznici unosa podataka u Registar i propisuje da se Registar vodi u elektronskom obliku.

**U članu 2.** definišu se vrste obaveza koje se unose u Registar.

**U članu 3.** određena je svrha uspostave Registra.

**U članu 4.** definisana je neutralnost pojmova koji imaju rodno značenje.

**U članu 5.** utvrđuje se Ministarstvo finansija Kantona Sarajevo kao nadležni organ za uspostavu, vođenje i dalji razvoj Registra, ovlaštenje Ministarstva finansija Kantona Sarajevo za prikupljanje, evidentiranje, obradu, korištenje i arhiviranje podataka, bliže pojašnjava svrha Registra i organi koji su dužni da pružaju stručno-operativnu i tehničku pomoć u obavljanju poslova.

**U članu 6.** definiše se sadržaj Registra, odnosno podregistri kao njegovi sastavni dijelovi, te daje ovlaštenje ministru finansija Kantona Sarajevo da svojom odlukom utvrđuje nove podregistre i na drugi način dopunjava uspostavljeni Registar.

**U članu 7.** utvrđuje se obaveza Ministarstva finansija Kantona Sarajevo da pripremi odgovarajuće uputstvo kojim se bliže uređuje postupak unosa podataka u Registar, reguliše način imenovanja odgovornih i ovlaštenih lica za unos podataka i dobijanje korisničke šifre, te rokovi za imenovanje i obavještanje Ministarstva finansija Kantona Sarajevo o imenovanju i promjeni lica odgovornih i ovlaštenih za unos podataka.

**U članu 8.** određuju se odgovorna lica za osiguranje potrebnih kapaciteta za obavljanje poslova, definiše organ zadužen za realizaciju edukacije i rok za provedbu edukacije.

**U članu 9.** definiše se rok za inicijalni retroaktivni unos podataka, određuje dalja dinamika unosa podataka i utvrđuje obaveza verifikacije izvršenog unosa od strane rukovodioca obveznika unosa podataka.

**U članu 10.** utvrđuje se odgovornost za tačnost podataka unesenih u Registar te korekcije naknadno uočenih pogrešaka.

**U članu 11.** definiše se automatizacija preuzimanja unesenih podataka od strane Ministarstva finansija Kantona Sarajevo i obaveza reagovanja u slučaju uočenog nepoštivanja odredaba zakona.

**U članu 12.** određuje se krug lica ovlaštenih za unos i nivoi privilegija za pristup i izmjenu podataka.

**U članu 13.** propisuje se da Registar nije javan te definišu ovlaštenja, uslovi i način ustupanja podataka iz Registra.

**U članu 14.** utvrđuje se odgovornost Zavoda za informatiku i statistiku Kantona Sarajevo za održavanje softverske aplikacije i očuvanje povjerljivosti, integriteta i dostupnosti podataka u Registru, te odgovornost korisnika za povjerljivost korisničke šifre.

**U članu 15.** uspostavlja se obaveza Zavoda za informatiku i statistiku Kantona Sarajevo da osigura pohranu informacija o unesenim podacima i korisničkim šiframa pod kojim su podaci uneseni.

**U članu 16.** date su kaznene odredbe za kršenje odredaba ovog zakona.

**U članu 17.** propisana je disciplinska odgovornost.

**U članu 18.** utvrđuje se odgovornost i rokovi za donošenje podzakonskih akata.

**U članu 19.** uređuje se da nadzor nad provođenjem ovog zakona vrši Ministarstvo finansija Kantona Sarajevo.

**U članu 20.** propisano je stupanje na snagu zakona.

## **OPIS KONSULTACIJA U TOKU IZRADE PROPISA**

Prednacrt zakona o Registru finansijskih obaveza u Kantonu Sarajevo je u skladu sa članom 56. Zakona o principima lokalne samouprave u Federaciji Bosne i Hercegovine („Službene novine Federacije BiH“, br. 49/06 i 51/09) dostavljen na konsultacije Savezu općina i gradova



Federacije Bosne i Hercegovine, te zasebno i Gradu Sarajevo i svim općinama u Kantonu Sarajevo.

Savez općina i gradova Federacije Bosne i Hercegovine zatražio je da predlagač zakona u najvećoj mogućoj mjeri uvaži stavove, primjedbe i mišljenja jedinica lokalne samouprave sa područja Kantona Sarajevo. Svoja izjašnjenja dostavili su Općina Stari Grad Sarajevo, Općina Ilijaš, Općina Centar Sarajevo i Grad Sarajevo. Općine koje su dostavile svoja očitovanja dale su podršku za donošenje zakona, s tim da su Općina Ilijaš i Općina Centar Sarajevo sugerisale određene intervencije u tekstu, koje su većinom uvažene. Primjedba Općine Centar Sarajevo da se postupak unosa i verifikacije podataka, te propisivanje mjera, sredstava i uslova zaštite i pohrane podataka u Registru treba definisati samim zakonom umjesto provedbenim aktima nije uvažena, jer je procjena predlagača da nije opravdano zakonom regulisati operativno-tehnička pitanja i procedure. Općina Centar je predložila i dopunu člana 3., jer nije potpuno definisana mogućnost predlaganja i donošenja mjera od strane nadležnog Ministarstva u pogledu finansijskih obaveza jedinica lokalne samouprave. Predlagač je ovu primjedbu suštinski uvažio kroz dopunu člana 5. stav (4), kako je to sugerisala Općina Ilijaš.

Grad Sarajevo dostavio je generalnu primjedbu da Kanton Sarajevo nije nadležan za donošenje zakona koji bi u predmetnoj oblasti bio obavezujući za jedinice lokalne samouprave i javna preduzeća čiji osnivač su jedinice lokalne samouprave odnosno pravna lica u kojim jedinice lokalne samouprave učestvuju sa više od 50% ukupnog kapitala, ističući da jedinice lokalne samouprave imaju vlastite nadležnosti ustanovljene ustavom i zakonom i da se imaju pravo baviti svim pitanjima od lokalnog značaja koja nisu isključena iz njihove nadležnosti. Kao vlastite nadležnosti su u ovom kontekstu naročito istaknute:

- donošenje budžeta jedinice lokalne samouprave;
- donošenje programa i planova razvoja jedinice lokalne samouprave i stvaranje uvjeta za privredni razvoj i zapošljavanje;
- raspisivanje javnog zajma i odlučivanje o zaduženju jedinice lokalne samouprave, itd.

U izjašnjenju se dalje navodi da su javna preduzeća čiji je osnivač Grad Sarajevo osnovana u skladu sa Zakonom o javnim preduzećima u Federaciji Bosne i Hercegovine („Službene novine Federacije BiH“, br. 8/05, 81/08, 22/09 i 109/12) i Zakonom o privrednim društvima („Službene novine Federacije BiH“, broj 81/15), te da je osnivanje i rad javnih preduzeća u isključivoj nadležnosti Federacije Bosne i Hercegovine. Izjašnjenje se zaključuje konstatacijom da Grad Sarajevo ne želi izbjeći Registar finansijskih obaveza o kojim, u skladu sa federalnim propisima, izvještava dostavom periodičnih i godišnjih izvještaja o izvršenju Budžeta Grada Sarajeva.

Stav predlagača je da se predloženim zakonom ni u kojem smislu ne dira u pravo jedinica lokalne samouprave da se bave svim pitanjima od lokalnog značaja koja nisu isključena iz njihove nadležnosti.

Svrha uspostave Registra je prvenstveno uspostavljanje baze podataka o finansijskim obavezama svih obveznika kako bi se mogao konstatovati stvarni dug u Kantonu Sarajevo. Kanton Sarajevo će na osnovu podataka iz Registra kreirati, predlagati i provoditi politike, strategije i mjere u skladu sa pozitivnim propisima, što podrazumijeva i poštivanje principa lokalne samouprave i samostalnosti u odlučivanju jedinica lokalne samouprave o svim pitanjima iz njihove vlastite nadležnosti. Podaci iz Registra mogu biti podloga i osnov za donošenje odgovarajućih odluka i na nivou jedinice lokalne samouprave, što su prepoznale i sve općine koje su učestvovala u konsultacijama izrazivši punu podršku uspostavi jedinstvenog Registra.

## **FINANSIJSKA SREDSTVA**

Za provođenje ovog zakona nisu potrebna dodatna finansijska sredstva u budžetu Kantona Sarajevo.